



## SIARAN MEDIA

### KEMENTERIAN TENAGA, SAINS, TEKNOLOGI, ALAM SEKITAR DAN PERUBAHAN IKLIM (MESTECC)

3 November 2019

---

### PERTANDINGAN DEBAT ALAM SEKITAR ANTARA INSTITUSI PENDIDIKAN TINGGI KALI KE-26 TAHUN 2019

---

**TERENGGANU, 3 November 2019** – Pertandingan Debat Alam Sekitar (DAS) Antara Institusi Pendidikan Tinggi (IPT) Kali Ke-26 Tahun 2019 telah dilaksanakan dalam bentuk transformasi baharu dan mengutamakan tajuk usul alam sekitar yang kontemporari. Kaedah penjurian tahun ini yang tidak menggunakan kertas (*paperless*) atau *green assesment* dilaksanakan ke arah ‘debat mesra alam’ Bahasa Melayu yang pertama di Malaysia.

Kaedah ini selaras dengan keperluan di bawah Sustainable Development Goals (SDG) bagi melahirkan generasi pemimpin masa hadapan yang berwibawa dan berani menyuarakan pendirian berkaitan isu-isu alam sekitar bagi memupuk masyarakat yang prihatin terhadap isu-isu tersebut.

Selain itu, debat tahun ini juga menyokong program kempen hindari plastik sekali guna bagi memberi pendedahan kepada mahasiswa akan keburukan kesan plastik terhadap ekosistem dunia.

Pertandingan Debat Alam Sekitar antara IPT kali ke-26 ini dianjurkan oleh Jabatan Alam Sekitar (JAS) dengan kerjasama Kementerian Pendidikan Malaysia, Majlis Debat Universiti Malaysia (MADUM), Dewan Bahasa dan Pustaka (DBP) dan Universiti Sultan Zainal Abidin (UNISZA) sebagai tuan rumah. Pengajuran tahun ini yang disertai oleh 28 IPT dari seluruh negara telah mendapat kerjasama daripada Petroliam Nasional Berhad (PETRONAS) sebagai rakan strategik.

DAS merupakan pertandingan debat tahunan sejak tahun 1991 yang diharapkan dapat meningkatkan pengetahuan dan kesedaran dalam kalangan mahasiswa tentang pelbagai isu dan permasalahan alam sekitar. Ia juga mampu membentuk budaya berfikir yang kritis dan seni berdebat yang sihat dalam kalangan mahasiswa.

Pada pertandingan debat pada tahun ini juga akan diwujudkan jaringan alumni yang menghimpunkan bekas-bekas pendebat alam sekitar. Jaringan ini memberi peluang kepada mereka untuk berkongsi idea dan buah fikiran bagi memantapkan lagi pertandingan debat alam sekitar pada masa akan datang. Malah dengan sokongan dan kerjasama erat diharapkan pertandingan debat ini dapat dilaksanakan secara berterusan demi memupuk generasi yang prihatin terhadap kelestarian alam sekitar.

- **TAMAT** -

---

Sebarang pertanyaan lanjut, sila hubungi:

En. Mohd Azmi bin Abdul Majid  
Pegawai Perhubungan Awam  
Unit Komunikasi Korporat, MESTECC  
No. Tel: 03-88858822

Atau

En. Sharudin Rosli  
Pegawai Perhubungan Awam  
Jabatan Alam Sekitar  
No. Tel: 012-3023864

Dikeluarkan pada 3 November 2019